

NOBILISSIMO ATQUE DOCTISSIMO
DOMINO AVCTORI RESPONDENTI
AGNATO SVO HONORATISSIMO

S. P. D.

P R A E S E S.

Neque chartæ, neque temporis, spatium, quod utrumque perexiguum sentio, me, ad scribendam abiturienti TIBI epistolam hanc allicuit, non nisi ex ea, qua semper erga TE animatus fui, adfectione, profluentem, nec alio fine exaratum, quam ut TIBI eximios, quos in utroque, privato & publico jure, exemplari diligentia, optimisque moribus adquisivisti profectus, & luculentissimum illorum documentum, præsentem Dissertationem TVAM inauguralem, insigni doctaque patriarum rerum notitia prorsus commendabilem, e qua præter consilium, librorumque, quibus usus fuisti, copiam, mihi nihil vindico, immo, quam temporis angustia impeditus, ne quidem solitæ aliæ limæ meæ subicere potui, sincere gratulandi, TEque præcipua nunc Themidos Musarumque Germaniæ domicilia adeuntem, EXTERIS omnibus, eisque præsertim, qui me amant, qui mihi favent, & quorum singularem gratiam non submisisse minus veneror, quam impense mihi gratulor, ea, qua par est, observantia & devotione, enixe commendandi, exoptatam habeam occasionem. Faxit modo DEVS, ut, qui TE exteris mox propriis ipsemet commendabis meritis, in ita & reditu, salvus semper sis & incolumis, ut exacto, quod TIBI æque utile & prosperum adprecor, ac quidem jucundum erit, itinere, digna TE præmia capias, sicque letus, AMPLISSIMO DOMINO PARENTI TVO, quem, ut nosti, omnis nostra familia patrem veneratur, largissimam curarum suarum messem præbeas. Quod reliquum est, mea TIBI semper promptissima spondeo officia, TVI in me amoris certissimus. Dabam XIII. Kalendarum Januarii
MDCCLV.

